

Segun Formado Mike Eman

Minister Plenipotenciario pa e siguiente cuater aña lo tin un tarea adicional

ORANJESTAD – Aunke cu e 9 ministernan a keda oficialmente conoci, e posicion di Minister Plenipotenciario pa Den Haag Hulanda ainda ta pendiente. Sr. Richard Arends a wordo acerca pero e decision final, ainda no a keda concretisa. Segun formado Mike Eman, e tarea di e Minister Plenipotenciario e biaha aki ta haya un dimension adicional. Banda di e trabou cu

Minister Plenipotenciario actual, sr. Edwin Abath a haci pa e ultimo 4 añanan, esaki lo haya su enfoke specifico.

RELACION DEN REINO
Segun Eman, na momento cu nan a drenta gobierno 4 aña pasa e relacionnan den reino tabata sumamente deteriora unda no tabatin niun confianza den e forma cu Aruba



tabata wordo goberna y e direccion cu nos pais tabata bayendo. Un esfuerzo hopi grandi a wordo haci pa restaura e relacion importante aki y yega na hopi acuerdo di cooperacion cu Hulanda unda awe Aruba ta wordo mira como un bon ehempel con pa yega na acuerdonan hopi mas constructivo di cooperacion entre Aruba y Hulanda.

GATEWAY

Asina tambe a yega na un acuerdo di 'Gateway' pa uza Aruba su cercania na e mercado di Sur America. Hulanda ta hopi interesa pa

exporta hopi di su conocimiento y establecimentonan di Hulanda cu ta un tiki mas cerca di e fronteranan di Sur America lo ta mas exitoso pa drenta e mercadonan aki hunto cu profesionalnan di Aruba cu ta papia e idioma Spaño cu conoce e cultura di comercio di Latino America.

DUNA CONTENIDO

E Minister Plenipotenciario ta bay tin banda di e tarea di continua traha riba e relacionnan den reino cu a wordo mehora y drecha, pa bay duna contenido awo na e acuerdonan di cooperacion

cu Aruba a firma cu Hulanda pa por desaroya e pilar economico aki pa Aruba. "Esey kiermen no solamente representacion digno y di calidad den Rijksministerraad, pero di acerca y mehora relacionnan cu empresanan y hopi di e organisacionnan na Hulanda, como tambe municipio y provincianan na Hulanda cu kier forma parti di e vision di un Aruba sostenibel", Eman a bisa. Aruba tin cu yega cerca nan y trece e mensahe y esaki ta e tarea adicional di e Minister Plenipotenciario pa e siguiente cuater aña. □